

Буре ваён

Тыршы жечсэ гинэ кизыны...

**Йоскалык библиоте-
каын ортчиз писа-
тельёсты но журна-
листъёсты Василий
Михайловез но Евге-
ний Афонинэз буре
ваён «Туриос дор пала
лобыку...» ужрад. Туэ
та дано гожьясьёслы
100 арес тырмысал.**

Дораз данъяло

Улонзылэсь бадзым люкетсэ Василий Михайлов но Евгений Афонин сйзизы «Советской Удмуртия» (та дыре «Удмурт дунне») газетлы. Василий Михайлович 20 ар валтйсь редакторын ужаз, Евгений Григорьевич 25 ар корреспондент но гурт удысья отделэн кивалтйсьез вал. Соослэсь улон сюрессэс, творчествозэс тодэ ваён понна ик библиотекае люкаскылызы чыжы-выжыоссы, соосын артэ тыршем адымиос, шаерчиос, студентъёс.

Ужрадэз нуиз «Удмурт дунне» газетлэн туннэ нуналлы валтйсь редакторез Елена Миннигарева. Пумиськонэз усътиз В. Михайловлэн вордскем гуртысьтыз — Пичи Пурга ёросысь Виль Мёнъясь — «Виль жардон» коллектив. Гуртоос туж даньяско но сйлы каро Василий Михайловез. 100 ар тырмонэзлы сйзыса, Виль Мёнъялан ужрад ортчытызы. Школаысь удмурт кылъя дышетйсь Лидия Воронцова верамъя, нылпиос дано муртсылы сйзем докладъёсын пырыськыло конференциосы.

Василий Михайловлэн ужан сюресэз туж узыр вал. «Советской Удмуртиын» со 1951-тй арын ужаны кутскиз, берлогес редакторлэн воштйсьез, кыл кутйсь секретарь луиз. 1959-тй арын В. Михайловез юнматйзы УАССР-ысь культура министрлы воштйсе, 1960-тй-1965-тй аръёсы со министр вал. Бөрйсь берытскиз газетэ, «Советской Удмуртиен» 20 ар кивалтйз, со сяна, КПСС-лэн Удмурт обкомезлэн бюрозь бырйылэмын вал.

— Тодйськом вал, газетын ужан вакытаз Василий Михайлович ужасьёсыз азе чурит куронъёс пуктылиз, дисциплинаез зол возиз. Соин монэ, «Удмурт дуннелэсь» нырысетй нылкышно



Евгений Афонинлэн нылыз
Мargarита Мальцева.

редакторзэ, со шумпотыса өз пумита. Но уже пөрме шуыса валамез бере тыбырам вешамез вань, — тодаз вае Йоскалык прессалэн юртэзлэн кивалтйсьез Зинаида Рябинина. — Василий Михайлович 90 арлэсь кема улйз, солэн кулытозяз ваньмыз радъямын вал: шайвылэ 2 инты басътэмын, чакламын, кыче огазеяскон соосты чакласа-утялтыса возэз.

Узыр кыл тйрлык

Евгений Афонин вордскемын Глазов ёросысь Вильгуртын. Начар улонэн йырин вордскем палъёсысьтыз со 15 аресказ кошконо луиз. Нырысетй дипломезья — кунсёр кылъёсыа дышетйсь. Пичи Пурга ёросын потйсь «Ударник» газетлэн редакторез вал. Выйл партшколаын дышетскыкуз, 1951-тй арын, сое арест улэ басътызы. 58-тй статья янгыше уськытэмзы бере 4 арзэ пытсэт сёрбын пукиз. Шонере поттэмын но мозмытэмын вал. «Удмуртия» издательствоын ужаз, «Колхозная правда» газетлэн редакторез вал. 1957-тй арын «Советской Удмуртиен» гурт удысья отделэ литсотруднике кариськиз. Пенсие потытозяз, Евгений Афонин гурт удыс сярэсь гожъяз.

— Василий Михайлович но Евгений Григорьевич туж ваче пумит адымиос вал. Огез — лымшорысь, мукетыз — уйпалась. В. Михайлов



Василий Михайловлэн Орина сузэрэзлэн
пиезлэн пиез Георгий Алексеев.

удмурт, Е. Афонин жуч. Огез котьку кивалтйсь, мукетыз — литраб (соку корреспондентъёсты озы нималлязы). Но Евгений Григорьевич берло гинэ газетсыс отделэн кивалтйсь луиз. Кыкназы но ортчемын Быдзым ожез.

Тодмо вал, В. Михайлов огдыре Е. Афонин дорын кункуаын но улэмын шуыса — уго Евгений Григорьевичлэн Ижын аслаз коркаез вал. Но чемысь та воргоронъёслэн кусыпсы туж зырдалляз, — тодаз вайиз «Удмурт дунне» газетлэн азъвыл редакторез Алексей Шкляев.

В. Михайловлэн но Е. Афонинлэн удмурт литератураын интызы сярэсь вераз филология наукаосъя кандидат Александр Шкляев:

— Василий Михайловлэн кыл тйрлыкэз туж узыр — чошатыны луоно удмурт классиклэн Михаил Петровлэн кылыныз. Мон малпасько, со туж жеч

писатель луысал, уго «Натй» поэмаез, веросъёсын но очеркъёсын «Гуртэ сюрес» книгаез выли дунъямын вал, но Василий Михайлович ассэ партийной ужлы сйзиз.

Евгений Григорьевич сярэсь верано ке, туж жаласько, азъвыл соин матысь тодматскыны өз кылды шуыса. «Йырмурт» повестьсэ лядзыса гинэ, валай, мар пыр ортчемын адыми. Пайми узыр кылызлы: Евгений Григорьевичез жуч выжысь шуо, нош гожьяськоназ кыче быгатыса кутэмын уйпал диалект

Чылк-чылк рукописьёс

Евгений Афонинлэн ужын зэмос профессионал луэмез сярэсь вераз журналист Иван Лебедев, уго со гурт удысья отделын ужаны кутскемын.

— Евгений Григорьевич вань улытозяз

дышетскиз. Кунсёр кылъёсты тодэ вал, зоотехнике дышетскиз на. Сое быдэс республикаысь колхоз кивалтйсьёс тодылызы — данэз туж вылыын вал. Со дыре ик Евгений Григорьевич быгатылиз муртлэсь ужзэ дунъяны, өз бадзымъяськылы. Кылсярэсь, рукописьёсыз чылк-чылкесь вал — марзэ ке тупатэ ке, вылаз векчи полоска бумага ляке, выльысь гожтэ. Гожмам, наштам рукописьёссэ машинисткаослы өз сётъялля.

Евгений Афонинлэн нылыз Margarita Евгеньевна вераз:

— Солы трос шугсекытъёс пыр орточо луиз: сютэм улон, война, лагерь. Но сълмыз өз измы, кётжожен өз улы. «Книгазэ кузьмакуз, гожтйз: «Нылы, аламазэ, кулонэз сямен ик, вормыны уг луы. Та сярэсь тодыса выльысь, тон тыршы жечсэ гинэ кизыны. Со гинэ юрттоз асьмелы вормыны сълэм измонэз. Шуд но тазалык тыныд».

Тодэ ваёнъёссэ вераз Василий Михайловлэн Орина сузэрэзлэн пиезлэн пиез — Георгий Алексеев. Со пусйиз, дядя Вася туж сълмаськиз, нылпиос жеч мед дышетскозы шуыса, бурдяны быгатйз.

Ужрад туж шуныт ортчиз. Фронтовикъёсты буре вайыса, Быдзым ожлы сйзем кылбуръёсты лядзызы Пичи Пурга ёросысь Виль Мёнъя школаын дышетскись Ангелина Никитина, Удмурт кун университетсыс студентъёс Влад Сурчаков но Вероника Капралова. Синвуэз пызыртйзы архивъёсын утиськем видеоужъёсысь люкетъёс но.

Елена СКВОРЦОВА

Ялон

КУПЛЮ ДОМ

тел. 8-904-231-90-47

в любом селе/деревне
Республики Удмуртия.

С документами.

Состояние не важно.

**Цена
от 40 до 110 тыс. руб.**

Реклама

Пансионат по уходу за пожилыми людьми

**Золотая
Осень**

Забота как дома!



Нужна помощь - звоните: 8-950-150-10-38
г. Ижевск, ул. Курортная, 2 8-912-460-57-14

ИП Лазукова Н.В. ИНН 18346886526 ОГРН 309184019000048